

# 1,000 warga UMP sambut Maulidur Rasul dan ulang tahun ke-9 penubuhan UMP

Lebih 1,000 warga Universiti Malaysia Pahang (UMP) menyertai perarakan dalam suasana yang cukup meriah sambil berselawat memuji kebesaran Maha Pencipta dan keagungan junjungan besar Nabi Muhammad SAW.

Perarakan yang melibatkan 27 kontingen yang antaranya Persatuan Sahabat Masjid (SAHAM), Pejabat Antarabangsa (IO), Fakulti Kejuruteraan Elektrik & Elektronik (FKEE), Jabatan Pendaftar, Jabatan Bendahari dan Pusat Teknologi Maklumat & Komunikasi (PTMK) ini bergerak dari Kompleks Sukan menuju ke Masjid UMP.

Perarakan turut disertai Naib Canselor UMP, Profesor Dato' Dr. Daing Nasir Ibrahim, Timbalan Naib Canselor (Akademik & Antarabangsa), Profesor Dr. Badhrulhisham Abdul Aziz, Timbalan Naib Canselor (Penyelidikan & Inovasi), Profesor Dato' Dr. Rosli Mohd. Yunus bersama pengurusan dan ketua jabatan yang lain.

Dalam pada itu, Dato' Dr. Daing Nasir berkata, Islam adalah mengenai keamanan, keharmonian kesederhanaan dan perpaduan.

"Unsur kecantikan inilah yang perlu ditonjolkan dan diterjemahkan dalam kehidupan seharian dan cara kita bekerja.

"Hanya dengan kebijaksanaan dan keterbukaan ini maka umat Islam akan dihormati dan disegani," katanya.

Beliau berkata demikian ketika menyampaikan ucapan sempena sambutan Maulidur Rasul Peringkat UMP dan sambutan ulang tahun kesembilan penubuhan UMP di Kompleks Sukan UMP pada 16 Februari 2011 yang lalu.

Menurut beliau, dengan genapnya sembilan tahun usia UMP, adalah penting untuk warga UMP bermuhasabah tentang liku ranjau masa lalu dan memandang ke hadapan dengan cabaran yang bakal ditempuhi.

"Warga UMP perlu terus celik dan sedar akan kewajipan mereka dalam menyusun tindakan atas landasan keutamaan, berbudaya kerja cemerlang yang berasaskan nilai, berfokuskan strategi dan berpandukan prestasi untuk menjayakan Pelan Strategik UMP 2011-2015 ke arah kecemerlangan.

Menurutnya, warga UMP perlu sentiasa mengutamakan pengisian berbanding bentuk dan formaliti bagi memastikan universiti ini terus relevan dan lestari.

Sementara itu, Pengarah Pusat Islam dan Pembangunan Insan (PIPI), Dr. Hasan Ahmad berkata, penganjuran sambutan Maulidur Rasul ini bukan sekadar memperingati sambutan keputeraan Rasulullah SAW malah menonjolkan kebudayaan dan kesenian Islam kepada masyarakat terutamanya di kalangan warga kampus.

Katanya, pelbagai acara disusun sepanjang seminggu festival berlangsung melibatkan program khidmat masyarakat, ziarah, program motivasi, ceramah, bicara cinta dan penganjuran wacana kenegaraan.

Pada majlis yang sama, Dato' Dr. Daing Nasir turut menyampaikan hadiah dan cenderahati kepada pemenang acara perarakan yang dinilai daripada sudut keseragaman berpakaian, hiasan dan mesej yang disampaikan dalam setiap pasukan.

Jabatan Hal Ehwal Pelajar & Alumni (Saffad) diumumkan pemenang tempat pertama diikuti Fakulti Kejuruteraan Awam & Sumber Alam (FKASA) di tempat kedua dan Jabatan Canseleri memenangi tempat ketiga.

Selain itu, wacana bertajuk 'Institusi Kenegaraan Islam' yang diadakan pada 17 Februari 2011 yang lalu merupakan program penutup tirai Festival Maulidur Rasul 1432H tahun ini.

